

易

經

揆

一

易經揆一卷五

臣梁錫璵集

彖上傳

設卦而繫以辭爲彖。繫傳曰。彖者言乎象者也。時  
彖者材也。卦有德有體有象。皆材也。德猶心也。體猶  
身也。象則身之形也。卦原於德。德著爲體。體成有象。  
言象足以該之矣。故曰彖者言乎象者也。彖從豕。坎  
象也。書名兼取坎離曰易。卦辭獨取坎曰彖。何義乎。  
蓋乾藏於亥。開於子。坎爲天一所生。故獨取坎象乎。  
先釋名後釋辭。而雜取卦德卦體卦象以明其蘊。乃  
其釋辭亦或直據卦時而論其義。明其蘊者。見名所

由名。辭所由繫。論其義者。蓋不論卦之盈虛消息。皆具開物成務之道也。卦德震爲動。艮爲止。兌爲說。坎爲陷。而不言陷。惟險斯陷。陷則無可言矣。故言險。巽言入。未盡其妙。故卽曰巽。離爲麗。又以陽在外爲明。柔文剛爲文。坤爲順。順承天。妻道也。又爲厚。厚載物。母道也。乾則或言健。或言剛。或兼言剛健。或卽言乾。蓋夫子序包犧之畫卦也。曰以通神明之德。是乾兌離震巽坎艮坤之名。至矣。不可以加矣。故文言傳之。贊乾曰剛健中正純粹精。且恐未盡。而以大哉發端也。此仍言乾之意也。止言剛。以體言。止言健。則在內。

體爲體。外體爲用。兼言剛健。則剛爲體。健爲用。而或未必盡得純粹精之意也。蓋設卦以盡情僞。情其本然也。僞其後起也。天不容僞。而人或失之。故以卦擬人。而其德遂有凶有吉。訟之乾德曰剛曰健。皆非吉德。他可知矣。卦德多以一人言。兼取卦體。如訟之上剛下險。履之說而應乎乾之類。則不以一人言也。卦體有言兩體者。履曰柔履剛是也。有言消長者。臨曰剛浸而長是也。有言一畫而兼全體與比應者。大有曰柔得尊位大中而上下應之。師曰剛中而應。渙曰柔得位而上同是也。有言六畫者。恆曰剛柔皆應是也。

也。卦象有以全體爲象者。小過之飛鳥是也。有以兩體爲象者。屯之雷雨是也。有以六畫爲象者。家人之父子兄弟夫婦是也。至先儒因傳言往來上下相沿爲卦變之說。如云泰自歸妹。否渙自漸。无妄自訟。但泰否之三陽皆大。三陰皆小。是統言上下體而非三四兩畫之變也。无妄之剛自外來。渙之柔得位乎外。外。外卦也。同體非外也。而渙之六三亦非得位也。且益之自上下下。自何卦而變乎。朱子取卦變釋彖者止十九卦。而損益不在焉。卦變之說自是窮矣。繫傳曰。爻者言乎變者也。非可以變釋彖也。然則所謂觀

變於陰陽而立卦者何義乎。曰此著之變也。十有八變而成卦是也。自無之有也。卦成有變。乾之姤之類是也。自此之彼也。義各有當也。夫陰陽兩端循環不已。則變易也。乾入坤而成男。坤入乾而成女。則交易也。因而重之。故有往來上下之義。其言大來剛來剛下。則乾與三男之居內者也。大往剛往剛上。則乾與三男之居外者也。坤與三女亦然。是傳言往來上下之意也。

大哉乾元萬物資始乃統天雲行雨施品物流形大明終始六位時成時乘六龍以御天乾道變化各正性命

保合大和乃利貞

以卦象釋卦辭。上天之載無聲無臭。犧爲之揭其精。曰乾維天之命於穆不已。文爲之引其端曰元。元者天之生物之德故大也。萬物咸資元以始。乃元則無終無始。亨卽生之通。利卽生之遂。貞卽生之藏。故曰乃統天。天之功寄於地。而六子分司其職。坎離得乾坤之中。尤其大用之所在。故由元而亨。而天氣之絪縕。烝爲雲雨。天象之昭垂。發爲大明。雲行雨施。則資元以始者。咸有品。以分其類。形載於地。氣貫於天。故曰流形。流者。生意暢盛。不假造作之煩。且裕源源不

已之意也。大明日也。日麗天而判晝夜。辨寒暑。故終而有始。分陰分陽而六位成。衆剛迭用而六龍具。乘則得機。御則有節。妙於一時而已。乃生意發而不收。則窮。亨利之介發而能收。故推其本始曰乾元。著其變化曰乾道。天所賦爲命。物所受爲性。大和者。性命之蘊也。理與氣之妙合爲和。卽元也。元之歸根其體冲然而無朕。故謂之大和也。中庸中節之和爲時中。未發之中卽大和也。物之資始於元。固受天之命以爲性。而咸具此大和者也。第由元而亨。則氣行而理亦與之俱行。迨乾道變化。則大成大。小成小。而性命



於以各正。由是凝而愈固。而所謂大和者。斯保而不失。合而無間也。乃所謂利貞也。豈離元而別有利貞哉。此貞所以啟元而循環不已也。

### 首出庶物萬國咸寧

天者乾象也。聖人與天合德。亦乾象也。故復以聖人釋卦辭。天統於元。法天厥惟體元。惟至誠以合於乾。斯盡性而葆夫元。元德具而亨利貞胥統之矣。乾爲首。元又乾德之首。首出庶物。達天德而膺天位。萬國有不咸寧乎。天言萬物。此言萬國。萬物人爲貴。聖人蓋以立人道而參天地。故畧物言人也。

至哉坤元萬物資生乃順承天坤厚載物德合无疆含  
弘光大品物咸亨牝馬地類行地无疆柔順利貞君子  
攸行先迷失道後順得常西南得朋乃與類行東北喪  
朋乃終有慶安貞之吉應地无疆

以卦象卦體卦德釋卦辭天無窮地有體體成於土  
土不足以盡地也五行皆天地之生成土其一耳一  
至九皆天也二至十皆地也乾之大坤至之矣統攝  
無外曰大密比無間曰至始有氣生有形雖陽先而  
陰後實妙合而無間曰乃順承天非離乾元而別爲  
坤元也坤元無不至亨則徵之於厚蓋地數終於十

土成而地爲體焉。由二至十。順之所積故厚也。而生  
物者。且以載物。夫大氣鼓物而無疆者。天也。地形雖  
囿天中。地德直合天化含者。生意包於中。弘言所包  
者廣。蓋得坎以潤物於中。以合雲雨之施也。光者。生  
意達於外。大言所達者遠。蓋得離以燠物於外。以合  
大明之御也。至是而品物毫無欠缺。故曰咸亨。乾陽  
生子。由左而升。故東方之龍應之而飛於天。變化而  
自用者也。天類也。乃乾居午而坤陰已生。馬應之而  
行於地。馴習而爲用者也。後天離居午。其中陰卽坤  
之牝。牝馬地類也。應陰而生。隨乾成象。故能行地。无

疆馬非牝不足於柔順。牝非馬不能行地无疆。以盡利貞之義。柔順利貞。君子所行當如是也。順則協乎道。道之久而不變者常也。孤立則廢事。故曰乃與類行。絕類斯上同。故曰乃終有慶。无疆凡三見。首言天之無窮。次言馬之致遠。末言地之廣厚。相配爲合。惟厚斯足配天之化。相得曰應。惟安斯以得地之理。

### 屯剛柔始交而難生

以卦體釋卦名。乾剛坤柔。體之分也。受以屯。下體剛居柔下而爲震。始交也。剛必上。爲柔所陷而上體成坎。是難生矣。舊泥難生。遂若與蹇同義。不知乾坤始

交物之生意雖盈而質尚穉。故難生。非直以難爲義也。序卦兩卦同義者二。晉與漸也。臨與豐也。彖傳釋晉以進。漸則曰漸之進。明與晉異也。豐次歸妹。得其所歸者必大。必者已定之辭。故彖傳直釋以大。臨次蠱。有事而後可大。可者將然之辭。故彖傳曰剛浸而長。不言大也。是同義者且有不同。況屯盈蹇難。義迥異乎。

動乎險中大亨貞雷雨之動滿盈天造草昧宜建侯而不寧

以卦德卦象釋卦辭。剛德首見於動險中能動。其才

大矣。故大亨初動主而得正。卽曰貞。貞以善才之用也。蓋才所繫者重。用才者自不得輕。且貞則知微正志。不敢輕試。不求小得。而勿往之義具是矣。或又以解動險外。優於屯動險中。不知屯次乾坤物之始。動在險先也。解次蹇物之厄。險在動先也。屯如嬰而當養。解如病而求瘥。傳釋貞於乾坤外。有因卦爲義者。此之初得正而曰大亨貞。是其例也。有泛言理當如是者。蒙於卦無取而曰養正。是其例也。有以義斷而不拘卦位者。臨二非正而曰大亨以正。是其例也。雷行雨化。動而滿盈。絪縕之始。故曰天造。震居巽先爲

草坎反離明爲昧王者應運易草爲治開昧爲明在  
廣建賢哲以爲侯則紀綱立而名分定亦才知集而  
治具張尤當無教逸欲有邦不可遂自寧也坎爲勞  
卦五坎主不寧之象

### 蒙山下有險險而止蒙

以卦象卦德釋卦名山之高而下有險則難出險而  
止則不行在人則性爲氣囿而又不知向學也

蒙亨以亨行時中也匪我求童蒙童蒙求我志應也初  
筮告以剛中也再三瀆瀆則不告瀆蒙也蒙以養正聖  
功也

以卦體與義釋卦辭。人有真性所以可享。二用人可  
亨之性而行以時中之教。蒙所以亨也。五能下應。故  
嘉其志。剛中則應不窮而告有節。得時中之義矣。彖  
言瀆。瀆我也。瀆我而有益於蒙。何吝於告。豈知反以  
瀆蒙乎。不告以發其憤機。深於告矣。正在天爲命。在  
人爲性。雖蒙而常有良知良能之自動焉。不必迫而  
用之也。養之而已。乃童蒙人所易忽。遂以苟簡敗其  
材。且云有待。竟以蹉跎失其日。誠一養於正。不使小  
就不使失時。日就月將。忽不知其入於聖域矣。曰蒙  
以養正。正自具於蒙。非強蒙也。聖之無不知。無不能。



亦止正之盡。非盡由天授也。

需須也。險在前也。剛健而不陷。其義不困窮矣。

以義釋卦名。以卦德明其義而贊其善也。此與蹇皆曰險在前。艮陽之少力不足而蹇。乾陽之純力有爲而需。剛則靜而專。雄斷內蘊而不涉於浮。健則動而直。偉畧應時而不入於躁。故不陷。蹇言知非冒昧致阻。明於理也。此言義非畏避自全。斷以理也。義以定是非而兆吉凶。固已包知矣。

需有孚光亨貞吉。位乎天位以正中也。利涉大川往有功也。

以卦體卦象釋卦辭。需繼屯蒙。君師道備。足以承天。尊五曰天位。既治且教。而休養生息。以底於成。表其德曰正中。中爲天心。孚而亨矣。正爲天道。貞而吉矣。險濟爲有功。乃功之有視其才。才不勝則終廢。亦由於量。量不足則神撓。剛健則才足處險。量足涵險。進退疾除之數。豫有成謀矣。故時當待。根深寧極。寂若無爲。時當乘。應機赴節。動而莫禦。是以有功也。坎離居上體多善。當位而中正也。得中而上行也。與乾合尤善。蓋五於三才爲天。坎中陽。與下乾同德。故曰位乎天位。離中陰。與下乾相應。故大有曰得尊位。履上

乾卽以五爲帝位。乾之所以大也。養欲遍物。以形體言之曰天位。而下則乾繼天而大其養也。禮以定民。以主宰言之曰帝位。而上卽乾本帝而綏厥猷也。

### 訟上剛下險險而健訟

以卦體卦德釋卦名。上剛下險。分言之也。上恃勢。下懷伎。剛險相接。訟之由也。險而健。兼言之也。不險不足定謀。不健不足起事。旣險且健。訟之具也。訟多起於上。以剛陵下。而下之險能造謀者。遂以險敵剛。剛遇敵亦必反而用險。險由於剛則健矣。險敵剛則險之藏者不終藏。亦健矣。故曰兼言剛健。剛體也。健用

也

訟有孚窒惕中吉剛來而得中也終凶訟不可成也利見大人尚中正也不利涉大川入於淵也

以卦體卦象釋卦辭。訟以險健而生。二爲坎之主。上爲乾之成。訓戒具是矣。二剛有孚也。剛來下陷。窒也。來居二。惕也。二則得中也。終則至上而成矣。五中正。能虛心盡下而聽不偏。因事推情而斷合理。訟者亦必以中正合之。故曰尚。倘非孚。情得必窮。非中正。罪彰必治。何利之有。川之深處爲淵。彼恃才蹈險。淺可游也。深難出也。

師衆也。貞正也能以衆正。可以王矣。

以義含卦象。以釋卦名。復以義釋卦辭。而贊之也。師有三義。以帥師者言爲長。以治師言爲法。以所帥所治者言。則衆也。同人大有皆以柔成卦。乃以有剛同剛爲義。重剛也。師比皆以剛主卦。反曰衆曰下。以柔見義。何也。蓋國之大事。惟戎死生存亡繫焉。師曰衆。重民命。止兵端也。至天之設君。所以爲民。比曰下順從。示邦本。明君道也。師比皆五柔。獨師曰衆。蓋比主五。有德有位而人心歸之。則合衆爲一。師主二。有才。有權而職事統之。爲以一兼衆。又坤爲衆。比衆在內。

無事安居樂而忘其衆。師衆在外。有事犯難。憂而形其衆。我衆彼亦衆。則勢相敵。我善用彼亦善用。則才相敵。卽時有利鈍。亦互爲雄雌。能以衆正。雖億萬不可爲衆。雖節制豈足當仁義哉。且恭行天討。時固在我。有罪旣誅。大畏小懷。羣歸於一。而王矣。可之云者。決於師之出。不俟功之成也。夫正已則物正。乃惡一人而伐一國。又用吾民而威克之。仁者固如是乎。曰。日月之明有不照。蔽之也。德教之行有不化。亦蔽之也。彼以國爲蔽。非師何以制其命。況師出以律。自無不用命之人。而各欲正已。又彼國之雲霓而望者乎。

剛中而應行險而順以此毒天下而民從之吉又何咎  
矣

又以卦體卦德釋卦辭。剛中者。德徵爲才也。旣統舉  
柔而釋以衆。此復取五之應二。重君之任也。坎爲行  
險爲毒。坤爲順爲民從。師之興。費財動衆。傷和致災。  
誤於一投禍至不救。如毒藥攻病。非不得已不可用  
也。將得人。雖亦不無毒於天下。然而民從之者。順也。  
順則才運爲道也。能以衆正。廟筭之貞。行險而順出  
師之貞。其毒民乃以安民。故吉而无咎也。

比吉也

衍丈不然宜在下順從也之後而有闕文耳

比輔也下順從也

以義釋卦名。輔猶輔車相依之輔。輔者比之義。順從又輔之義。從出於分之不可逃。順且切於情之不容已。

原筮元永貞无咎以剛中也不寧方來上下應也後夫凶其道窮也

以卦體釋卦辭。剛爲生天下之德。元也居中斯永正則貞矣。前以五柔爲下。尊上之辭。此曰上下。舉衆之辭。至尊無上。上下猶云遠近也。應卽順從意。蓋元德人所同。我先得之人自維繫而不可解。後則失順從



之道故窮。凡言窮皆示以當變。變則通也。

小畜柔得位而上下應之曰小畜。

以卦體釋卦名。衆剛我柔。情易投。居介得位。勢則便。上應上同其功。下應下戢其健。

健而巽剛中而志行乃亨。密雲不雨尚往也。自我西郊施未行也。

以卦德卦體卦象釋卦辭。內健畜之心。外巽畜之用。巽主四。以柔居陰。必假剛以達之。特不可過耳。故曰剛中而志行。大有衆也。曰是以元亨。易辭也。小畜寡也。曰乃亨。難辭也。巽爲長爲高。故曰尚往。尚往終必。

雨。謂之未行。非終不行矣。

履柔履剛也。

以卦體釋卦名。

說而應乎乾。是以履虎尾。不咥人。亨。

以卦德釋卦辭。下體雖柔。德爲說。則盡在下之道。柔而不可陵矣。上體雖剛。以情性謂之乾。應則得其性情。剛而不逞矣。然說而應。非柔媚失已乎。曰。兌體剛中。柔外。非柔媚也。應乾則合乎天理。不咥之亨。所謂順理則裕。何失已之有。

剛中正。履帝位而不疚。光明也。

又以卦體推履義。彖言履虎。豈上以威制下。彼龍象  
仁育而虎象義正。固卽制禮之本矣。剛中正。則德稱  
其位。故不疚。由是本身徵民而天下寡過。蓋以此乎。  
三以乾爲大君。此以五爲帝位。正名也。此取體之純。  
曰光明。爻欲善其用。曰貞厲。正本也。

泰小往大來吉亨。則是天地交而萬物通也。上下交而  
其志同也。內陽而外陰。內健而外順。內君子而外小人。  
君子道長。小人道消也。

否之匪人。不利君子貞。大往小來。則是天地不交而萬  
物不通也。上下不交而天下无邦也。內陰而外陽。內柔

而外剛內小人而外君子小人道長君子道消也

泰否爲乾坤之闔闢。聖人重之。故不暇分名與辭。而以卦象卦體卦德總釋之。以深致其欣歎之情也。其言交不交。釋卦名也。言內外。釋卦辭之往來。言消長。釋吉亨與不利。君子貞也。泰否之運。啟於造化而成於人事。故兼舉天地上下。天地以氣言。天下地上爲交。天上地下則不交。上下以位言。柔下應爲交位。仍在上。剛得應爲交位。仍在下。上剛下柔。則不交也。泰正月之卦。其時草木未舒。否七月之卦。其時華實並茂。泰之氣化。似不如否之盛。而覘天時者。有以識其

啟閉之機。故泰曰萬物通。否曰不通也。泰之時。上謙下接。下剛上進。否之時。君甚尊。臣甚卑。民甚賤。泰之名位似不如否之嚴。而察人事者。有以知其理亂之故。故泰曰其志同。否直曰天下无邦矣。同而言志。迹不盡同。蓋可否相濟。而非以水濟水也。乃反是。卽云无邦。何至是耶。曰邦之建。由人人之立。在道。道之存。惟心志不同。則乖離。而其心失。心失則道失。故曰匪人而邦本撥矣。本撥必覆。豈待家國爲墟而始悟哉。陰陽申造化之意。蓋天地統體之陰陽。由天地分之。無一物無陰陽也。健順剛柔以已言。君子小人以類。

言申人事之意。內陽外陰。資始有氣者。資生有形。內陰外陽。則根已潛傷而光隨上泄矣。健順德也。剛柔質也。否匪人。失德而徒存其質也。內健外順。實積於中者。文見於外。內柔外剛。則萎薺於欲而外僅色厲矣。由是德成而動君子之心。樂從吾遊。德失而與小人以隙。因緣而至。內君子外小人。直爲腹心者。枉自必錯。內小人外君子。則與奸爲體而正人終棄矣。夫交不交。猶彼此對立。至內外已分主客。終以消長。遂大爲抑揚。然消長之義。亦有異。泰主陽。陽主生。小人道消。非去小人。化小人爲君子也。夫有陽必有陰。有

君子必有小人勢也。攻而去之以爲快。豈並生之心。且窮而反噬。將爲深害矣。善治身者。化痰邪爲氣血。善治國者。化盜賊爲良民。不惟不爲梗。且爲吾用。泰之爲壯。爲夬。爲乾。此象也。故曰吉亨。否主陰。陰主殺。君子道消。非止害其身。兼必毀其名節也。故不善藏其用者。撓其禍。而淺中弱植之徒。且變操而降以相從。否之爲觀。爲剝。爲坤。此象也。故曰不利君子貞。夫易於陰陽。恆致意焉。復曰剛反。臨曰剛浸而長。大壯曰大者壯。皆舉陽而不及陰。非徒尊陽。示自治之道也。至夬。始主陽及陰。曰剛決柔。自治至。可以治人矣。

而治人亦正未易。故以陰爲對。示善處之道也。遯與臨反。其名因陽起義。且特主五以釋遯之亨。曰剛當位而柔之浸長。不以之釋卦名。而附於小利貞之下。且不與臨之剛浸而長同辭。止曰浸而長。觀與大壯反。亦主五上之剛。曰大觀在上。而四陰之盛。附於有孚顒若之下。曰下觀而化。此二卦皆陰長而變。文主剛。惟姤曰柔遇剛。剝曰柔變剛。似與夬同例。而實不同。蓋於陰生卽爲陽慮。使防其始。於陰盛猶欲陽善其道。恐其盡也。獨泰否爲乾坤之具體。又當陰陽往來之平。故並言天地上下陰陽健順剛柔君子小人。



以備其象。闡其德。廣其類。而盡其情也。

同人柔得位得中而應乎乾曰同人

以卦體釋卦名。同人大有皆主柔。惟虛能通曰同人。惟虛能受曰大有。大有曰得尊位。此止曰得位。非同。人之道專屬之下。蓋言得下通人情之位也。天爲萬物之君。柔得天位。故能受天下之歸往。地爲萬物之柄。柔得地位。故能通天下之人情。蓋降已之浮情躁氣而平易近人。斯能深入人心也。大中能立天下之極。得中可酌人情之平。下則徇情。過卽矯情矣。大有主量曰上下應之。同人主性情曰應乾。乾主五二應。

五而中虛。成離之爻也。離象心。心之虛所以涵天也。人雖異而其心之天則同。故應乾斯能同人也。應乾有三義。二應五。君臣之同。柔與下二剛同體。與上乾相應。內外之同。一柔同五剛。剛皆本乾。則大同也。

同人曰

文衍

同人于野。亨利。涉大川。乾行也。文明以健。中正而應。君子正也。唯君子爲能通天下之志。

以卦體卦德釋卦辭而贊之。二柔也。與乾應。則不以已行而以乾行。心純無私。才健有爲。德易知。險也。故多助而亨。必達而利。文明則洞悉人情。健則能克己。

而不拂人從欲能平情而不違道于譽應乾有三義而所主在二故曰中正而應夫健而無私于野之義然必以文明開其先以中正達其用斯盡無私之義而爲君子之正正者人之公理我得其理不期同自無不同卽有一二之不同者彼則悖矣我何與焉然溯其未雜於私之本心初無不同故終能通之格頑讒爲良化異類爲用胥是道也

大有柔得尊位大中而上下應之曰大有

以卦體釋卦名尊位以勢言大中以道言一柔當上之中故大非大不是主五剛也

其德剛健而文明應乎天而時行是以元亨

以卦德卦象釋卦辭傳獨此言其德蓋乾德之外惟此爲盛且大有兼勢而實重道道蘊於德所以元亨在德也剛健則雄斷內蘊文明則睿照旁行全體柔爲主而剛應之取其義爲大有下體乾爲天而五應之又取其象曰應天應天之妙用存乎時善繼其志而爲其所欲爲先天也而未始先時也善述其事而爲其所當爲後天也而未始後時也具剛健文明之德而應天時行足以合大中之義而四達不悖矣屯隨臨无妄升革釋元以大大有膺大中之運蠱建萬

事之統鼎受維新之命。仍曰元。同人曰應乾以心而達天德。此曰應天。膺命而行天道。坤之承天時行。造物之時。代其終之謂。此之應天時行。人事之時。當其可之謂。

謙亨。天道下濟而光明。地道卑而上行。天道虧盈而益謙。地道變盈而流謙。鬼神害盈而福謙。人道惡盈而好謙。謙尊而光。卑而不可踰。君子之終也。

以卦象卦體釋卦辭。天一而施其道下濟。濟施也。光明者。化育昭著而不揜也。地兩而承其道卑。而氣則上行也。卑與高對。天不言高。天氣而已矣。以其虛之

無窮謂之高。不必以高名也。高不虛非謙矣。下濟與上行對。光明則合而成化育之功也。乃獨歸之天者。地承天。不尸其功也。卦無乾體。然三男各得乾陽。皆天道也。至艮則上著。故曰光明。下濟與卑。謙之意。光明上行。亨之意。日月昃食。寒暑推移。虧盈而益。謙也。高有崩道。海王百谷。變盈而流。謙也。福善禍淫。栽培傾覆。害盈而福。謙也。上有予奪。衆有褒譏。惡盈而好謙也。下濟上行。道之運用也。虧益變流。道之變化也。皆以無心而成。鬼神則天地之功用。而造化之迹也。好惡人之情。然由我召之。則與無心者同。故亦曰道。

也。三爲艮上。尊也。謙以制禮。位因謙而益顯。故光居  
坤下。卑也。謙爲德柄。德因謙而益重。故不可踰。備乾  
坤之德而止而不遷。則足以配天地而無疆。故曰君  
子之終也。一剛成卦者。豫曰剛應。剝曰變剛。以剛釋  
卦名。復曰剛反。師比曰剛中。以剛釋卦辭。謙以三成  
卦而不言。謙有剛而不用也。又畫多重五位。五有柔  
中之善。亦不言。謙有位而不恃也。卦德內止外順。亦  
不言。蓋謙德最難言。其止其順。非可力强。若云止乎  
內而順乎外。未免有意。未盡謙之量矣。故先以天道  
地道明無心之謙。後卽成謙之爻而明其效。而所以

爲謙未之及。蓋欲人深思自得。實知己之所以與天地同體。自無盈之患。而謙義得矣。

豫剛應而志行順以動豫

以卦體卦德釋卦名。小畜主四曰上下應之。與大有同義。此亦宜與比同義。且豫之剛勝小畜之柔。乃變文曰剛應何也。蓋柔不利遠。則剛不利近。故五以爲疾。上不應也。而欲下之應。是威脅而非心服。可云下應之乎。今剛居陰而比五。應乎君也。爲震主而居坤上。民情由是達。應乎民也。由是致豫之志始行矣。與理無違曰順。順以動。則情中其節。事協其宜。



豫順以動故天地如之而况建侯行師乎

以卦德釋卦辭。應僅類情。順直通德。且順在動先。未發之時純乎理。其動自能會三才於一致。建侯行師猶其小者耳。

天地以順動故日月不過而四時不忒。聖人以順動則刑罰清而民服。豫之時義大矣哉。

極言卦德之善而贊之。失其度曰過。愆其序曰忒。以理爲樞而二五順布。天地以順動也。故日月協度而四時得序。以理爲治而張弛隨時。聖人以順動也。故經正民興。不煩刑罰而服。豫時也以順成。豫義也。卦

各有時。時各有義。義各有用。止言時者四。備四時之義也。解由冬而春。陽之噓。草由夏而秋。陰之吸。於此言時。重其始也。噓。噓由春而夏。噓之極。節由秋而冬。吸之成耳。冬之爲終。賴於頤之養。夏之爲大。危於過之顛。後天乾居西北。時至亥。坤入乾矣。純陰不能殺物者。頤也。巽得坤初。居東南。時至巳。乾入坤矣。純陽不可爲首者。過也。又先天復爲冬至。其時天在坤。日在頤。姤爲夏至。其時天在乾。日在大過。握乾坤之會。依子午之位者。頤與大過也。故冬夏之時。於此贊之也。言時義者五。以陰陽升降取也。豫爲雷出。隨爲雷

入。祇以陽言也。遯下艮陽上而退。姤下巽陰生而來。陰陽之變化也。豐翻爲旅。陰之中者亦退矣。言時用者三。以坎離取也。睽下兌上離蹇下艮上坎也。離始於同人。極於旅。同人親也。旅則親寡矣。坎始於屯。極於節。屯盈也。節則止矣。屯後十卦始有同人。節前四卦已爲旅。離之用。在坎範圍之中。故於重坎獨贊之也。言時重時。欲人謹之也。而義與用在其中。言義重義。欲人思之也。而用在其中。言用重用。欲人取之也。而義在其中。

隨剛來而下柔動而說隨

以卦體卦德釋卦名。剛非在下之物而下於柔。豈柔  
能加剛。剛自來而下之也。動而說。動而以說行之也。  
故爲隨。舊於卦體作我隨人。卦德之說作人隨我。豈  
人隨我亦責之以大亨貞无咎乎。而天下隨之反爲  
贅語矣。

大亨貞无咎而天下隨時隨時之義大矣哉

王肅本上  
隨時作隨

之下隨時時字在之字下今當從  
之篆丈之爲止時爲咎故易誤也

以義釋卦辭而贊之。剛居初爲貞。隨固大亨。貞乃无  
咎。天下隨之其效也。隨出於正而非私要惠結。自足  
通天下之情而以隨致隨矣。隨之時義不其大哉。

蠱剛上而柔下巽而止蠱

以卦體卦德釋卦名。四偏合體。下經取夫婦之象者。咸恆以兩體相應也。漸歸妹以成卦之爻猶在中而相近也。損益同於咸恆而言上下。上下之義重也。然綢繆構精繫傳發之。隨蠱成卦皆在初上。非近非應。於夫婦無取。止象上下耳。然易用無方。義可旁通。故恆之剛上柔下。居室之正。此之剛上柔下。則長女下少男。邪媚之惑。春秋傳以女惑男爲蠱是也。巽爲進退。巽而止。終於止矣。故爲蠱。

蠱元亨而天下治也。利涉大川往有事也。先甲三日後

甲三日終則有始天行也

以義釋卦辭。先事而言治。欣之也。釋今不爲。極重之勢成。雖有知者。無以善其後矣。曰往有事。鼓其勇。兼示以慎也。國家之事。壞而莫收。則因窮成沴。人之終卽天之終也。陰陽之運。剝而已極。則因戰成復。天之始卽人之始也。天有行。轉瞬卽逝。人有事。及鋒奏功。不然。英雄起而乘之。命已他移。權奸伺而竊之。柄亦旁落。蓋天恆假其用於人。人事不盡。天無如何矣。

臨剛浸而長

以卦體釋卦名。浸。漸而不驟也。亦來而未艾也。漸而

不驟斯來而未艾。故曰天地之道浸。故陰陽勝。

說而順剛中而應大亨以正天之道也。至于八月有凶。消不久也。

以卦德卦體與義釋卦辭。說則心和順則事當。剛中則道勝。應則情通。有浸長之勢而復備此善。則大亨不恃勢而由理矣。故曰以正復爲陽之潛。言心臨爲陽之見。言道夫天運有常。剛之長。人欲其急而弗能急。必以次而長。故曰浸。旣長而成。人遂以爲無消。乃亦以次而消。故曰不久。臨本以正而成。凶必以正而弭。盡天道斯以延天數得正。過八月而猶吉。失正未

及八月而已凶。

大觀在上順而巽中正以觀天下

特贊卦名。因以卦德卦體釋其義也。臨以浸長而卜其大。此於在上而表其大。蓋二陽雖上歛而氣象固自昭明也。方長足以臨已上。可以觀陽德之盛如是乎。在上重其位也。順以宅心則理得。巽以制事則權行。美其德也。中正善其行也。有順巽之德。故能行合中正。然德不可見。可見者行耳。故曰中正以觀。觀非有意表暴。德盛而流。默示於聲色之表耳。合位之大德之大行之大。斯之謂大觀。故及之遠而曰天下也。



易經卷一 第三  
觀盥而不薦有孚顒若下觀而化也

以卦體釋卦辭。誠者性之德。有孚。則以性牖性。下之觀者。自化也。姤曰女壯。遯曰浸長。否曰道長。則此之童。幾有蠢動之象。闕。幾有潛伺之象。進退。幾有欲逞之象。四及外。幾有上陵之象。化者變其惡。併泯其迹也。

觀天之神道而四時不忒。聖人以神道設教而天下服矣。

因下觀而推其義。下觀而化。莫知其然之謂神。神非人所爲。天也。五上爲天。陽實爲誠。誠則神矣。天之運

見於四時而終古不忒。其所以不忒無聲臭可尋。故曰神道也。觀天而知化民之本矣。聖希天而與天同德。則與天同道。夫恃政令爲教。下徒口應之。或僅身應之。以神道設教。則精意有以潛通乎民。民直以心應之。而服時行物生。教設民服。服故化也。蓋誠其所存。神其所存。而妙於物者乎。

### 頤中有物曰噬嗑

以卦象釋卦名。先釋而後舉名。噬嗑明夷井也。不先釋其名不著也。蓋明入地中。日入之象。君子處亂世。明必見傷。故取爲明夷之象。井之成於人也。同於鼎。

鼎倣卦象。其義顯。故曰鼎象也。井之制。會入而上之意。其義幽也。此下震象。頤之下動。剛間爲有物。動能噬。噬能合。故擬以噬嗑之名也。

噬嗑而亨。剛柔分動而明。雷電合而章。柔得中而上行。雖不當位。利用獄也。

以義與卦體卦德卦象釋卦辭。噬而合之。其間亡。故曰噬嗑而亨。節由兌西入坎北。此由震東入離南。皆曰剛柔分。柔入剛節之義。剛入柔。噬之義。舊以三剛三柔爲剛柔分。但三剛三柔之卦多矣。而平分不雜。又孰若泰否乎。噬則頤分。嗑則頤合。上離下震。體之

分將噬也。體必有用。下動上明。方噬也。用必有象。動如雷。明如電。已噬也。故曰合。乃頤中有舌。柔得中也。噬雖不繫於舌。而權於舌也。以用獄言。柔則玩。剛則殘。分則不剛。不柔矣。動威也。威則人不敢欺。明則人不能欺也。雷電合。威明已至。情既得矣。故曰章。以不剛不柔爲體。以威明爲用。其歸特主五之柔。然得中。則非寬縱。蓋歛恤之深心。寓於法內也。三柔爲上體。巽曰上同。兌曰上窮。獨離曰上行。五爲位之尊。中爲德之美也。乃以不當爲病者。君德貴剛。剛中正。斯能化民而無刑。柔則德不足也。夫周治三叔。聖人猶以

爲病。况此本不當。安得不揭之以動人重德之思。乃雖不當而爲離主。則下無遜情。柔則虛心詳審。居陽則執法不移。得中則上刑下刑。世輕世重。咸有倫要。何情之不得。何間之不除。故曰利用獄。

賁亨柔來而文剛。故亨分剛上而文柔。故小利有攸往。以卦體釋卦辭。成內體之文者柔。柔來者本先立而文行焉。成外體之文者剛。分剛上者本於內之誠。以爲文之則。乃由中而分者也。譬諸草木。春夏之敷華。柔來文剛也。秋冬之成實。剛上文柔也。草木以實之種而生。至其後而各成其實。非所謂一實而萬分者。

乎。

天文也。文明以止，人文也。觀乎天文，以察時

變，觀乎人文，以化成天下。

天文也。上有闕文。

以卦

亦當闕

卦德推卦義。先儒云：天文也。上當有剛柔

交錯四字。但噬嗑翻爲賁。交錯正同。亦將曰天文乎。且交錯又孰若旣未濟乎。聖經闕文。闕之可也。乃天文之義竊嘗推之矣。乾爲木果。陽至木末。成形而爲果。則陽至天際。成象而爲日月星。日月星其天文乎。乾陽止於艮。艮上卽乾上也。剝下坤。艮附於坤。其上爲碩果。賁下離。離性上。達於艮之上。離德明。協於艮。

道之光明。而以艮之止止離之炎。故成象而爲日月星。日月星隨天而運。而其終古有常度者。猶爲艮之止矣。卦德則有人文之義也。粲然有儀文之明。截然有則文之止。止則不過飾以戕其本真矣。一明一止而文成。禮以節文爲訓。此意也。夫出震齊巽見離陽得陰助至離而明。自春至夏之象。役坤說兌戰乾勞坎成艮。陽以節陰至艮而成。自秋至冬之象。下離上艮。時變具矣。而時變亦日月星運行而成。故曰觀乎天文以察時變。乃一歲有四時之變。今古有草昧文明之變。天時變而人事起。質勝濟以文。文勝救以質。

視所當然而立之則使範圍於文明以止之中故曰  
以化成天下。化者變而新之。成則化之成也。察時變  
得因革損益之宜。化成天下則極一道同風之盛。夫  
文之運。天開之人效之。文之化。人成之。天應之。故文  
明以止。則禍亂不作。災害不生。而日月軌道五星順  
序矣。天文人文其理一也。

剝剝也柔變剛也

以義釋卦名。以卦體明其義也。君子去小人。名正言  
順。聲其罪。與衆棄之。故夬曰決。小人害君子。理不直。  
必萋菲浸潤以侵蝕之。故剝曰變。一字之間情狀皦



然矣。

不利有攸往。小人長也。順而止之。觀象也。君子尚消息盈虛。天行也。

以卦象卦德與義釋卦辭。否曰。小人道長。此直曰小人長。不往。斯善藏其用。彼雖長而無害。然象之意。非僅避小人之禍。卽有順而止之之道焉。夫小人有時。君子有道。小人有機。君子有知。陽孤。非知何以存。陰盛。非道奚以化。不顯樹之幟。與彼鬪捷。順其勢而默爲轉移。彼自歸我範圍之內而止。蓋於不往之中。發君子之深心妙用也。凡卦皆象。獨鼎曰象。重器也。象

皆當觀。獨此曰觀象爲處變之君子言也。曉以觀象。欲其知天。訓以尚消息盈虛。欲其事天。蓋天行闔闢無方。盈而消。漸至今之虛。虛而息。又漸至後之盈。能觀而尚之。養晦以安其闔。畜力以待其闢。則天因人以爲端。而理扶勢以得轉矣。彼競於末流。是謂褻天。與世浮沉。亦爲棄天。均非尚也。

### 復亨剛反

以卦體釋卦名。兼釋卦辭。剛反復也。反則必進。亨也。動而以順行。是以出入无疾。朋來无咎。反復其道七日來復。天行也。利有攸往。剛長也。復其見天地之心乎。

又以卦德與義釋卦辭而贊之。陽窮始反。宜爲世珍之。乃久鬱而亨。或銳而思逞。陰尚盛而伺隙。反害於亨矣。震索乾其性動。而體方育於坤。卽宜法坤之順。歛才於德。範身以禮。時可爲。爲之有漸。勢可舉。舉之得宜。所謂順也。始可培初。回元氣而无疾。養後來全力而无咎。乾大象曰天行。純乾則不息也。乃不息之中。有交際之關焉。故蠱曰終則有始。於其關以先後。甲彌之。有闔闢之分焉。故剝曰盈虛消息。於其分以不往守之。有循環之運焉。故此曰反復其道。於其運以往承之。往則長矣。天地之心。生物之心也。無乎不

在。第至坤則藏。今靜極動初。杳然闇然之中。恍露生  
生之倪。雖微而所存不可揜。故曰復其見天地之心  
乎。由是而剛長。孰非此心之所推。反是而履霜堅冰  
亦孰非此心之所貫。特於復示人以見。庶由原可以  
竟委云爾。道專目天行。心兼舉天地。蓋合而生物有  
同心也。氣之運旋謂之道。道有反復。理之渾合謂之  
心。心無改移。惟心無改移而常存。斯道有反復而不  
息。此理得之人則仁也。聖人心天地之心。則與天同  
運。其復也。本義所謂靜極而動是也。大賢以下未能  
與天同運。則以介然有覺爲端。而緝熙之初之不遠。

其上也。二至五亦各據所至以爲復。至云惡極而善殊未然。語曰未有小人而仁者也。蓋君子而不仁。過也。惡則有心。極則惡根於心。不能復矣。然卦何以由剝而復。曰剝能復。碩果也。小人剝廬終不可用矣。蓋循環者天數。以人事言。卦止六位爲此之終。七日爲彼之始。如桀紂爲極亂。然治在湯武。不在桀紂也。卽窮而反本。將死言善。要亦窮與死迫之。而非善之由於心。設其窮轉而不窮。其死幸而不死。猶夫人也。況桀放南巢。反以夏台釋湯爲悔。惡極能復善乎。夫欲仁仁至。誰其阻惡人以反善之機。自逃之耳。故剝上

變爲小人剝廬。迨陽之復。二至五皆從陽以復而上。獨述是雖聖賢與居不能化而入矣。蓋仁人心也。人之安宅也。性之之聖卽心爲宅。反之之聖以心還宅。然方其未純。未嘗無一息之間。如所謂三月之或違。違者自內而出。隨出隨反。未能以心還宅。則就功之淺深而分離合。故曰日月至焉。至者理不爲主。若自外而至。此頻復之屬。視復其初者有間矣。乃其不至之時。固不可謂之仁。亦不可謂之惡。故曰苟志於仁矣。無惡也。不志仁則趨於惡。然一念欲仁。仁亦至。第志不立。踰時已失。至放其良心而不欲。天理亦不容。

遽泯。夜氣養之。平旦而相近。心所欲爲至。氣所息止。爲近。至且晝。梏亡。猶有時而近。梏之反覆。夜氣不足以存。此之謂迷復也。夫卽心爲宅。如富有四海者。隨其所行。皆其所在。以心還宅而未純。如有國者。以國爲家而不能無外。日月至。如人有家而須於外者。正多。故出入無常。若放其良心。如離鄉背井之人。然亦有時思歸。所謂欲仁仁至也。卽不知思歸。進退得自由。猶有相近之時。甚則犯罪之人。爲人所梏。其居不能。有矣。故曰亡。然罪之輕者。事已猶得生出。梏之反覆。則惡極罪大而不可解。故曰夜氣不足以存。而其

心死矣。此人心存亡之大較也。

无妄剛自外來而爲主於內

以卦體釋卦名。外乾也。剛自外來。所性之實理自天賦之也。賦之天失之人而妄起矣。妄不從形迹止也。不復其天不斷其萌爲主於內。則復其初。而天德之剛常爲此心之主也。故曰无妄。

動而健剛中而應大亨以正天之命也。其匪正有眚不利有攸往无妄之往何之矣。天命不祐行矣哉。

以卦德卦體卦象釋卦辭。動而健所主之剛不以動而移。而四達不悖矣。剛中而應所存之剛不以應而



私而萬物歸懷矣。故曰大亨以正。臨曰剛浸而長。以天陽之進言。道自本生也。此曰剛自外來。以天之賦於物言。命自上降也。而盡性固有以至命。命之正以理言。命之祐以氣言。夫无妄誠也。中孚信也。无妄曰剛自外來而爲主於內。本天德爲德也。曰動而健則內外一致。曰剛中而應則人已不隔。曰大亨以正天之命。則人與天一矣。中孚曰柔在內而剛得中。柔在內者。去私以虛其心。剛得中者。私旣去而真心斯見。視本天德爲德者。有間矣。曰說而巽。說者和以宅心。巽者權以度物。視內外一致者。有間矣。曰孚乃化邦。

言如是之孚乃能化邦。視人已不隔者有間矣。曰中孚以利貞乃應乎天。夫無意必固我。事自當理。次則克己之盡亦能復禮。彼克己而猶未復禮。或能去欲惡攻取之私。能泯意必固我之私乎。克己而復禮。斯无妄矣。中孚僅心有實。尚未保意盡無私。何能必事皆當理。故曰中孚以利貞乃應乎天。視人與天一者有間矣。

大畜剛健篤實輝光日新其德剛上而尚賢能止健大正也

以卦體卦德釋卦名。卽以之釋卦辭。德以拘蔽而昏

欲畜德者宜循其本。蓋德賦於天。本剛健也。卽以剛健治其心。剛者清其神而不雜以一毫之私也。健者立其志而不乘以一息之怠也。乃存於中或失於外。又必篤以敦其體而氣不旁洩。實以踐其事而善不近名。則剛健之真得篤實以成之。而闇然日章矣。艮分乾陽而上著。故謙艮皆言光明。此下乾全乾之精盡達於艮。故明之發爲光。光之散爲輝也。拘蔽去而本體見爲新。日新不已。畜之成矣。乾德在內。賢也。上爲成卦之主。而與下乾同德。剛上而尚賢也。艮居乾上。能止健也。以篤實而成剛健。一剛而尚衆賢。下健

而能止之。皆大畜也。而利貞之義具是矣。曰大正。明成畜在上也。上剛成卦。其義甚大。而剛宜在上。故卽與以正也。小畜要於有孚。大畜本於大正。深哉。苟畜德不正。流於異端曲學矣。尚賢不正。無識而誤以不賢爲賢。無度而惟合已是容。不能野無遺賢矣。止健不正。雜以知取術馭。不能統於一。而化強梗爲用矣。尚賢之義。大有以有陽爲義。五卦主也。上居五上。五能尚之。亦爲五有也。本義歸之上。是五反爲上有矣。此以畜乾爲義。上爲艮主。乃卦主也。故曰剛上而尚賢。本義歸之五。是上反爲五所畜矣。况五以殯豕爲

象於止惡已非元吉。於尚賢奚取焉。

不家食吉。養賢也。利涉大川。應乎天也。

又以卦象釋卦辭。畜有養義。養賢者亦上也。尚以禮言。養以祿言。義相備也。在內爲家食。則賢爲下。乾益明矣。程傳以應天屬五。但四亦應矣。况大畜以相應爲畜。同德爲應。應天在上不在五也。大畜時也。時卽天也。畜之大而靜與天協。自利涉而動與天游。

頤貞吉。養正則吉也。觀頤。觀其所養也。自求口實。觀其自養也。

以義釋卦辭。所養我所養。裁成天地之道。輔相天地

之宜。不以煦燠爲惠。不使左右倖恩。所養者正矣。自  
養我自養。養其心兼養其氣。本末固有同原。養其德  
並養其身。精細要無二致。寡欲則養心者正矣。集義  
則養氣者正矣。養心養氣。所以養德也。飲食居處。所  
以養身也。不以饑渴害心。不以聲色汨性。養身者正  
矣。

天地養萬物。聖人養賢。以及萬民。頤之時大矣哉。

承所養而極言之。出震成艮。則貫四時兼八方。而天  
地之功化備矣。所以養萬物也。聖人養萬民而猶病。  
道在養賢。以及之耳。上賢已成。五尚之。與之共天位。

治天職。初賢未成。四應之。先納於膠庠。以成其才。不使犯觀我之凶。後裁之有位。以行其學。我得收顛頤之吉。皆所謂養也。頤以時爲大。故贊之。

大過大者過也

以卦體釋卦名。

棟橈本末弱也。剛過而中。巽而說行。利有攸往。乃亨。大過之時大矣哉。

以卦體卦德釋卦辭而贊之。木上加一奇。根株回暖之象。爲本。木上加一奇。枝葉向榮之象。爲末。本弱則難立。末弱則無附。大過雖以剛過爲病。究非剛不濟。

卦函四剛。皆中也。才質勝人而裁以中。不以意氣用  
事而以性情用事。且剛中所運。內沈潛而入事理。外  
和豫而協人情。事不輕發。發必投機。可以肩鉅而扶  
顛矣。故往而亨。夫棟撓禍變之大也。無才固束手。恃  
才輕試。亦恐悞觸禍機。反至莫救。當洶洶攘攘之際。  
持其志。入於幾。調於氣。妙旋轉之用於不動聲色之  
中。才畧之大也。斯有以應時矣。贊時蓋以訓才也。  
習坎重險也。

以卦德釋卦名。

水流而不盈。行險而不失其信。維心亨。乃以剛中也。行



有尚往有功也

以卦象卦德釋卦辭。盈將離限而出。失信則遇險而阻。不失者。臨萬仞之壑。直下不避。行百折之途。盈科必進也。一陽爲流行之本體。二陰則所在之分限。中故不盈。剛故不失其信。有孚之義也。人處重險而心能亨。乃以剛中而有孚也。坎勞卦。故曰往有功。天下之事。孰不以勞而成。逸而敗。

天險不可升也。地險山川丘陵也。王公設險以守其國。險之時用大矣哉。

極言坎道。乾示人以易。然尊無二上。卽險也。天陽生

子。下坎之陽。其氣上升。上坎之陽。三四皆陰。則虛。無階可升。以不可升爲險。故能神其道。坤示人以簡。然有高。有下。卽險也。坎爲川。兩坎之中。互艮。山與邱陵之象。以山川邱陵爲險。故能成其勢。體易簡之德。而爲有孚。立身之大本也。然道貴本末兼舉。一都一邑。創爲城郭溝池。京師關隘。秉夫地形阨塞。又禦物之大權也。所以爲民兼以垂遠也。夏陽舉而虢亡。虎牢城而鄭懼。西河失而魏蹙。大峴度而燕危。未嘗不歎設險之慮深也。設險法地也。至於刑賞之用。等威之辨。凡杜陵僭限上下者。皆無形之險。所以法天也。止。

言設險。舉易見者明之也。夫險有時。氣數往復。何可窮也。險有用。變化經緯。曷有極也。然惟立身險外者。能用險。故恆易知險。斯有以豫其防。以相反爲用也。亦唯置身險內者。能用險。故行險不失。斯有以扼其要。以相因爲用也。

離麗也。日月麗乎天。百穀草木麗乎土。

以卦德釋卦名。因推廣卦象。以起釋辭之意。離乘虛以出。而明徹於乾坤。可以知所麗焉。天積氣而在上。風雲雷雨皆氣屬也。而散而不常。惟日月爲氣之精。故得天成象。土積形而在下。飛走鱗介皆形屬也。而

運而自動。惟百穀草木爲形之植。故安土不遷。是知無一物無麗。得天安土。得所麗矣。利貞之義具是乎。重明以麗乎正。乃化成天下。柔麗乎中正。故亨是以畜牝牛吉也。

以卦德卦體釋卦辭。重明承麗天麗土而明人道也。人各有麗。而君臣立人道之綱。君軌於道。臣盡其職。是麗乎正也。火得所麗。一薪可以傳千萬。明得所麗。一心可以運天下。故化成也。上體不正而言正者。道在隨時制宜。蓋事理之正而不拘陽陰之位也。然其要一本於柔。離成於柔也。乃難之之辭。明非正何能

化成。是以審之之辭。柔非中正何以亨而吉。